



Número 569

VI lexislatura

22 de maio de 2004

SUMARIO

1. Procedementos de natureza normativa

1.2. Proxectos e proposicións de lei

1.2.1. Proxectos de lei

— Ditame da Comisión sobre o Proxecto de lei de creación do Instituto Tecnolóxico para o Control do Medio Mariño de Galicia

35260

Emendas mantidas polo G.P. dos Socialistas de Galicia

Doc. núm. 15692

35266

Emendas mantidas polo G.P. do Bloque Nacionalista Galego

Doc. núm. 15698

35267

— Emendas e votos particulares formulados ao Ditame sobre o Proxecto de lei de creación do Instituto Tecnolóxico para o Control do Medio Mariño de Galicia

1. Procedementos de natureza normativa

1.2. Proxectos e proposicións de lei

1.2.1. Proxectos de lei

Ditame da Comisión sobre o Proxecto de lei de creación do Instituto Tecnolóxico para o Control do Medio Mariño de Galicia

Presidencia

En cumprimento do disposto nos artigos 65 e 116 do Regulamento da Cámara, ordénase a publicación no *Boletín Oficial do Parlamento de Galicia* do Ditame emitido pola Comisión 8.^a, Pesca e Marisqueo, sobre o Proxecto de lei sobre o Proxecto de lei de creación do Instituto Tecnolóxico para o Control do Medio Mariño de Galicia.

Santiago de Compostela, 21 de maio de 2004

José María García Leira

Presidente

Ditame emitido pola Comisión 8.^a, Pesca e Marisqueo, sobre o Proxecto de lei de creación do Instituto Tecnolóxico para o Control do Medio Mariño de Galicia

A Comisión 8.^a, Pesca e Marisqueo, na sesión do día 13 de maio de 2004, á vista do Informe elaborado pola Ponencia sobre o Proxecto de lei de creación do Instituto Tecnolóxico para o Control do Medio Mariño de Galicia (doc. núm. 13360, exp. núm. 06/PL-0033, publicado no BOPG núm. 500, do 06.02.2004; emendas publicadas no BOPG 535, do 01.04.2004; informe de Ponencia publicado no BOPG núm. 558, do 05.05.2004), de conformidade co disposto nos artigos 116 e seguintes do Regulamento do Parlamento de Galicia, aprobou o seguinte

DITAME

Exposición de motivos

De conformidade co establecido no artigo 148.1.11 da Constitución española (CE), o artigo 27.15 do Estatuto de autonomía de Galicia atribúelle a esta Comunidade Autónoma a competencia exclusiva en materia de pesca nas augas interiores, o marisqueo e a acuicultura. Así mesmo, o artigo 39 do mesmo texto estatutario recoñece a potestade de auto-organización da administración pública galega.

Dentro das competencias da Comunidade Autónoma de Galicia, correspóndenlle á Consellería de Pesca e Asuntos Marítimos as relativas á calidade das augas e á produción de moluscos e outros organismos procedentes da pesca, o marisqueo e a acuicultura. Segundo dispón o Decreto 125/2002, do 4 de abril, polo que se establece a estrutura orgánica da Consellería de Pesca e Asuntos Marítimos, estas funcións son exercidas polo Centro de Control do Medio Mariño, integrado na devandita consellaría co rango de dirección xeral.

O Centro de Control do Medio Mariño ten como obxectivo xeral desenvolver un estrito e intensivo sistema de control sobre as características do medio mariño para darlle cumprimento formal á lexislación vixente en canto á produción de organismos mariños, achegar os coñecementos científicos necesarios para a correcta xestión dos recursos mariños e protexer e mellorar a calidade das augas costeiras.

Tendo en conta a natureza altamente cambiante e de difícil predición do medio mariño así como a estrutura organizativa e as condicións de explotación do propio sector pesqueiro, marisqueiro e acuicultor, requírese que as funcións do Centro de Control do Medio Mariño se exerciten dunha forma áxil, coa adopción de medidas e a achega de solucións dunha forma urxente. Para iso, cómpre a creación dun instrumento especializado que pola súa natureza teña capacidade económica e funcional e poida actuar coa axilidade e urxencia que as súas funcións esixen.

Polo tanto, créase o Instituto Tecnolóxico para o Control do Medio Mariño de Galicia como ente público adscrito á Consellería de Pesca e Asuntos Marítimos da Xunta de Galicia con personalidade xurídica e patrimonio de seu, que asume as competencias atribuídas ao Centro de Control do Medio Mariño, integrado como dirección xeral na Consellería de Pesca e Asuntos Marítimos.

Título I

Disposicións xerais

Artigo 1. Creación e réxime xurídico

1. No ámbito da Comunidade Autónoma de Galicia, e ao amparo do seu Estatuto de autonomía, créase coa denominación de Instituto Tecnolóxico para o Control do Medio

Mariño de Galicia un ente de dereito público con personalidade xurídica e patrimonio de seu e con plena capacidade e autonomía para o cumprimento dos seus fins.

2. O Instituto Tecnolóxico para o Control do Medio Mariño de Galicia rexerase por esta lei e polas disposicións que se diten no seu desenvolvemento e someterá a súa actividade ao dereito privado agás cando exercite potestades administrativas ou nos casos establecidos nesta lei ou noutras disposicións legais.

3. O Instituto Tecnolóxico para o Control do Medio Mariño de Galicia actuará baixo a dependencia da Xunta de Galicia no exercicio das funcións que lle confire esta lei e calquera outra que puidese asumir se fose necesario para o cumprimento dos seus fins.

4. O Instituto Tecnolóxico para o Control do Medio Mariño de Galicia adscribese á Consellería de Pesca e Asuntos Marítimos.

Artigo 2. Finalidade e funcións

1. O Instituto Tecnolóxico para o Control do Medio Mariño de Galicia é o instrumento da administración da Comunidade Autónoma de Galicia para o exercicio das funcións de control da calidade do medio mariño, de aplicación das disposicións legais en materia de control técnico-sanitario dos produtos do mar e de asesoría técnico-científica sobre pesca, marisqueo e acuicultura no ámbito das zonas de produción en augas competencia da Comunidade Autónoma.

2. O Instituto Tecnolóxico para o Control do Medio Mariño de Galicia ten como obxectivo xeral desenvolver un estrito e intensivo sistema de control sobre as características do medio mariño para darlle cumprimento formal á lexislación vixente en canto á produción de moluscos e outros organismos mariños, contribuír a desenvolver novas estratexias de explotación e comercialización baseada en ofertar produtos de óptima calidade con absoluta garantía sanitaria, desenvolver estudos de carácter científico-técnico destinados a facilitar os coñecementos necesarios para a correcta xestión dos recursos mariños e protexer e mellorar a calidade das augas.

3. Dentro da competencia da administración autonómica, e sen prexuízo das competencias atribuídas a outros organis-

mos, correspóndenlle ao Instituto Tecnolóxico para o Control do Medio Mariño de Galicia, entre outras, as seguintes potestades administrativas:

a) Aplicación da normativa sobre calidade das augas e da produción de moluscos bivalvos e outros organismos procedentes da pesca, o marisqueo e a acuicultura. En concreto, o control das condicións oceanográficas, bioxeoquímica mariña e poboacións fitoplanctónicas, das biotoxinas mariñas, da contaminación química e da contaminación microbiolóxica, tanto no referente aos organismos coma ás zonas de produción.

b) A investigación para o coñecemento e control das patoloxías dos organismos mariños sometidos á explotación comercial mediante a pesca, o marisqueo e a acuicultura.

c) Decretar a apertura e o pechamento do exercicio da actividade pesqueira, de marisqueo e acuicultura en función do resultado dos controis que se realicen sobre a calidade das augas e os produtos, en aplicación da normativa vixente.

d) Aquelas funcións que regulamentariamente se lle atribúan na loita contra a contaminación mariña.

e) O cumprimento dos programas de control do medio mariño que, no ámbito das funcións que establece esta lei, determine a Xunta de Galicia en función da lexislación vixente na materia e das súas propias necesidades para a xestión do medio mariño.

f) Aquelas funcións que, no ámbito de competencias da Comunidade Autónoma, poidan serlle atribuídas pola Xunta de Galicia en materia de control das características do medio mariño e dos seus recursos sometidos á explotación comercial.

4. O Instituto Tecnolóxico para o Control do Medio Mariño de Galicia dispoñerá das potestades administrativas e das facultades necesarias para o cumprimento dos seus fins, determinadas neste artigo, así como daquelas outras que se determinen nos seus estatutos ou no decreto de desenvolvemento, se é o caso. Nos devanditos estatutos ou decreto, determinaranse os órganos aos que se lles asignará a facultade de exercer as citadas potestades.

5. Corresponderalle ao instituto, ademais das potestades administrativas establecidas nos parágrafos anteriores, entre outras, as actividades de asesoría técnico-científica para o coñecemento das características da pesca, o marisqueo e a acuicultura, a elaboración de informes relativos ás funcións dos puntos a) ao c) e propoñerlle á Consellería de Pesca e Asuntos Marítimos as modificacións lexislativas necesarias para adaptar a lexislación autonómica ás novas normativas que diten, así como os cambios necesarios para darlles cobertura legal ás novas esixencias que o sistema de control estableza como necesarias.

Artigo 3. Das súas funcións

1. Para o cumprimento das súas funcións, o Instituto Tecnolóxico para o Control do Medio Mariño de Galicia goza de autonomía administrativa e económica e de plena capacidade de obrar, e pode realizar toda clase de actividades económicas e financeiras, sen máis limitación que a disposta nesta lei e nas disposicións que sexan aplicables. En particular, poderá conceder subvencións, prestar toda clase de servizos e executar obras, obrigarse, interpoñer os recursos e exercer as accións previstas polas leis.

2. Así mesmo, o Instituto Tecnolóxico para o Control do Medio Mariño de Galicia poderá establecer as correspondentes relacións de colaboración con institucións públicas ou privadas que desenvolvan actividades relacionadas coas súas actividades.

Artigo 4. Dos recursos

1. Contra os actos administrativos do Instituto Tecnolóxico para o Control do Medio Mariño de Galicia procederán os recursos previstos nas normas sobre procedemento administrativo aplicables na Comunidade Autónoma de Galicia.

Os actos administrativos ditados polo consello de administración ou polo seu presidente poñerán fin á vía administrativa e os ditados polo director poderán ser obxecto de recurso de alzada perante o presidente do consello de administración.

2. O exercicio de accións civís e laborais rexerase polas normas de xeral aplicación, e a reclamación administrativa previa ao exercicio das ditas accións dirixirase ao presidente do consello de administración.

Título II Estrutura orgánica

Artigo 5. Órganos

Os órganos reitores do Instituto Tecnolóxico para o Control do Medio Mariño de Galicia son o presidente do consello de administración, o consello de administración e o director.

Artigo 6. O presidente do consello de administración

1. O presidente do consello de administración será, por razón do seu cargo, o conselleiro competente en materia de pesca, marisqueo e acuicultura.

2. O presidente desempeñará a representación do instituto e exercerá as seguintes funcións:

a) Ordenar a convocatoria do consello, fixar a orde do día e presidir as sesións del.

b) Velar polo cumprimento das directrices de actuacións marcadas pola Xunta de Galicia.

c) Exercitar no seu nome accións e recursos, sen prexuízo do disposto no artigo 8.2.b).

3. O presidente poderá delegar no director calquera función que teña atribuída, excepto as que por prescrición legal sexan indelegables.

Artigo 7. O consello de administración

1. O consello de administración é o órgano superior colexiado de goberno do Instituto Tecnolóxico para o Control do Medio Mariño de Galicia.

2. O consello de administración estará constituído polos seguintes membros:

a) O presidente do Instituto Tecnolóxico para o Control do Medio Mariño de Galicia, que será o presidente do consello de administración.

b) Un vicepresidente, que será o director do instituto.

c) Catro vocais designados pola Consellería de Pesca e Asuntos Marítimos, de entre persoal ao servizo da administración autonómica que deberá ser persoal funcionario ou persoal laboral fixo.

d) Un vocal que teña a condición de representante dos traballadores do instituto.

e) Un secretario nomeado pola Consellería de Pesca e Asuntos Marítimos, que actuará con voz pero sen voto.

3. Correspóndenlle ao consello de administración as seguintes facultades:

a) Establecer e aprobar as directrices xerais e os plans de actuación do Instituto Tecnolóxico para o Control do Medio Mariño de Galicia.

b) Aprobar as normas de réxime interior do Instituto Tecnolóxico para o Control do Medio Mariño de Galicia, así como a organización dos servizos.

c) Aprobar o cadro de persoal e o seu réxime retributivo.

d) Aprobar a memoria anual, o balance e a conta de perdas e ganancias de cada exercicio económico.

e) Aprobar e elevarlle o anteproxecto de orzamentos e o programa de actuación e financiamento do ente ao órgano competente da Xunta de Galicia.

4. Regulamentariamente determinarase o funcionamento e o réxime de adopción de acordos do consello de administración.

Artigo 8. O director

1. O director do Instituto Tecnolóxico para o Control do Medio Mariño de Galicia será nomeado polo Consello da Xunta por proposta do conselleiro de Pesca e Asuntos Marítimos.

2. O director será o órgano encargado da dirección e xestión do ente público, e corresponderanlle as seguintes atribucións:

a) Executar os acordos do consello de administración.

b) Aprobar e subscribir todos aqueles contratos, actos e negocios xurídicos que sexan necesarios para o desenvolvemento das funcións do ente e o cumprimento dos seus fins.

c) Exercer a dirección do persoal do ente público.

d) Dirixir a xestión ordinaria do ente público.

e) Elaborar os orzamentos anuais e o programa de actuación e financiamento do ente, que lle serán elevados ao consello de administración.

f) Propoñerlle ao consello de administración as directrices xerais e os plans de actuación do Instituto Tecnolóxico para o Control do Medio Mariño de Galicia.

g) Propoñer a adopción das disposicións regulamentarias necesarias para a organización e o funcionamento do Instituto Tecnolóxico para o Control do Medio Mariño de Galicia.

h) Autorizar os gastos e ordenar os pagamentos.

i) Exercer todas as funcións que lle sexan encomendadas e calquera outra non atribuída expresamente a outro órgano do ente público.

Título III

Facenda e réxime de financiamento

Artigo 9. Facenda

1. Constituirá a facenda do Instituto Tecnolóxico para o Control do Medio Mariño de Galicia o conxunto dos seus bens e dereitos.

2. Os recursos estarán formados por:

a) Os bens que lle sexan adscritos pola Xunta de Galicia, así como os bens e valores que constitúen o seu patrimonio.

b) As consignacións orzamentarias que lle sexan asignadas nos orzamentos xerais da Comunidade Autónoma de Galicia, que serán suficientes para o desenvolvemento daquelas funcións definidas como potestades administrativas nesta lei, así como daquelas que como tales se designan regulamentariamente.

c) As doazóns, os legados, as subvencións ou as achegas voluntarias de entidades e institucións públicas ou privadas, así como de particulares.

d) Os ingresos que poida percibir polas súas actividades, a prestación de servizos e a execución de obras.

e) As rendas e os produtos que xeren os bens e valores que constitúen o seu patrimonio.

f) Os créditos, os préstamos e as demais operacións financeiras que concerte.

g) Calquera outro recurso ordinario ou extraordinario que se lle poida atribuír conforme as disposicións en vigor.

Artigo 10. Réxime de financiamento

O réxime orzamentario, contable e financeiro do Instituto Tecnolóxico para o Control do Medio Mariño de Galicia e das entidades e doutras formas asociativas que del dependan axustarase ao disposto na Lei de réxime financeiro e orzamentario de Galicia e na demais normativa concorrente.

Artigo 11. Efectividade dos créditos

Para o cobramento dos créditos que teñan a consideración de créditos de dereito público, o Instituto Tecnolóxico para o Control do Medio Mariño de Galicia poderá utilizar o procedemento de constrinximento nos termos regulados na normativa tributaria.

Artigo 12. Réxime tributario

O Instituto Tecnolóxico para o Control do Medio Mariño de Galicia queda sometido ao mesmo réxime tributario que lle corresponde á Xunta de Galicia.

Título IV Persoal

Artigo 13. Réxime de persoal

1. O Instituto Tecnolóxico para o Control do Medio Mariño de Galicia estará integrado polo persoal contratado

en réxime de dereito laboral, sen prexuízo do establecido nas disposicións transitorias.

2. O réxime de acceso aos postos de traballo do Instituto Tecnolóxico para o Control do Medio Mariño de Galicia será determinado polo devandito ente, de conformidade coa normativa vixente, así como os requisitos e as características das probas que deben realizarse para poder acceder a eles, sempre de acordo coas súas necesidades de persoal, coas vacantes existentes e coas súas dispoñibilidades orzamentarias.

A selección do persoal farase, en todo caso, de acordo con sistemas baseados nos principios de igualdade, mérito, capacidade e publicidade.

3. A relación laboral do persoal contratado polo Instituto Tecnolóxico para o Control do Medio Mariño de Galicia rexerase polo convenio colectivo propio do ente público, que en ningún caso establecerá unhas condicións inferiores ás establecidas no convenio colectivo vixente en cada momento para o persoal laboral da Xunta de Galicia.

4. A pertenza ao consello de administración non xerará en ningún caso dereitos laborais.

5. O persoal que preste servizos no instituto, no suposto de reingreso á administración, terá dereito ao recoñecemento dese tempo para os efectos de antigüidade e dereitos pasivos.

6. No suposto de extinción do instituto, o persoal afectado pasará a ser persoal da Xunta de Galicia.

Disposición adicional primeira. Subrogación do instituto

1. Regulamentariamente fixarase a data para o inicio da actividade do Instituto Tecnolóxico para o Control do Medio Mariño de Galicia.

2. Na data de inicio da actividade do ente público extínuese o Centro de Control do Medio Mariño como dirección xeral da Consellería de Pesca e Asuntos Marítimos, subrogándose o ente público en todos os procedementos e as relacións xurídicas, excepto as de natureza laboral, que se rexerán polo disposto nas disposicións transitorias desta lei, correspondentes á devandita dirección xeral.

3. Como consecuencia do anterior, os postos de traballo que, na data de inicio da actividade do novo ente, dependesen do Centro de Control do Medio Mariño quedarán amortizados dentro das relacións de postos de traballo dependentes da administración autonómica de Galicia, agás o disposto na disposición transitoria primeira, parágrafo segundo, e na disposición transitoria terceira, parágrafo segundo.

Disposición adicional segunda. Adscripción de bens

Para o desempeño das súas funcións adscribíense ó Instituto Tecnolóxico para o Control do Medio Mariño de Galicia os bens que regulamentariamente se determinen de conformidade coa Lei de patrimonio da Comunidade Autónoma de Galicia.

A adscripción implica a transferencia ó ente público das facultades de uso, xestión, administración e explotación vinculadas ós fins deste, sen cambio de titularidade ou cualificacións xurídicas dos bens e dereitos cedidos.

Disposición transitoria primeira. Persoal funcionario

1. O persoal funcionario de carreira da Xunta de Galicia que á entrada en vigor desta lei preste servizos no Centro de Control do Medio Mariño, integrado na Consellería de Pesca e Asuntos Marítimos co rango de dirección xeral, poderá optar, mediante escrito dirixido ao presidente do Instituto Tecnolóxico para o Control do Medio Mariño de Galicia, e durante o prazo que regulamentariamente se determine, por integrarse no cadro de persoal do ente público como persoal laboral fixo del, con recoñecemento, en todo caso, da antigüidade que lle corresponda, quedando no seu corpo de orixe na situación de excedencia voluntaria por incompatibilidade prevista no artigo 55.1 da Lei 4/1988, do 26 de maio, da función pública de Galicia. No suposto de reingreso na administración autonómica terán dereito ao recoñecemento do tempo que permanecesen en tal situación, para efectos de antigüidade e dereitos pasivos.

2. No caso de non exercitar a devandita opción, o persoal ao que se refire o parágrafo anterior permanecerá no posto de traballo que ocupaba na relación de postos de traballo da consellaría competente en materia de pesca, marisqueo e acuicultura, prestando os seus servizos no instituto.

Disposición transitoria segunda. Persoal interino

1. O persoal interino da Xunta de Galicia que á entrada en vigor desta lei estivese adscrito ao Centro de Control do Medio Mariño, integrado na Consellería de Pesca e Asuntos Marítimos co rango de dirección xeral, cesará como tal por amortización do posto de traballo, de acordo co previsto na disposición adicional primeira desta lei.

2. Porén, o persoal ao que se refire o parágrafo anterior pasará a integrarse no cadro de persoal do ente público como persoal laboral temporal del, con recoñecemento, en todo caso, da antigüidade que polos servizos prestados lle corresponda.

Disposición transitoria terceira. Persoal laboral fixo

1. O persoal laboral fixo da Xunta de Galicia que á entrada en vigor desta lei estivese adscrito ao Centro de Control do Medio Mariño, integrado na Consellería de Pesca e Asuntos Marítimos co rango de dirección xeral, poderá optar, mediante escrito dirixido ao presidente do Instituto Tecnolóxico para o Control do Medio Mariño de Galicia, e durante o prazo que regulamentariamente se determine, por integrarse no cadro de persoal do ente público como persoal laboral fixo del, con recoñecemento, en todo caso, da antigüidade e dos dereitos laborais de todo tipo que lle correspondan, quedando no seu grupo e categoría de orixe na situación de excedencia voluntaria por incompatibilidade prevista no artigo 24.5 do IV Convenio colectivo único para persoal laboral da Xunta de Galicia. No suposto de reingreso na administración autonómica terán dereito ó recoñecemento do tempo que permanecesen en tal situación, para efectos de antigüidade, podendo optar a un posto de igual ou inferior categoría á súa de orixe.

2. No caso de non exercitar a devandita opción, o persoal ó que se refire o parágrafo anterior permanecerá no posto de traballo que ocupaba na relación de postos de traballo da consellaría competente en materia de pesca, marisqueo e acuicultura, prestando os seus servizos no instituto.

Disposición transitoria cuarta. Persoal laboral temporal

1. O persoal laboral temporal da Xunta de Galicia que á entrada en vigor desta lei estivese adscrito ao Centro de Control do Medio Mariño, integrado na Consellería de Pesca e Asuntos Marítimos co rango de dirección xeral, cesará como tal por amortización do posto de traballo, de acordo co previsto

na disposición adicional primeira desta lei, polo que se extingue a súa relación laboral coa administración autonómica.

2. Porén, o persoal ao que se refire o parágrafo anterior pasará a integrarse no cadro de persoal do ente público como persoal laboral temporal del, con recoñecemento, en todo caso, da antigüidade e dos dereitos laborais de todo tipo que teña recoñecidos.

Disposición transitoria quinta. Convenio colectivo

Mentres non sexa aprobado o convenio colectivo propio do ente público, será aplicable o Convenio colectivo do persoal laboral da Xunta de Galicia, agás no referente á selección de persoal, que se realizará consonte o establecido no artigo 13.2 desta lei.

Disposición transitoria sexta. Probas de selección de persoal laboral fixo do ente

Nun prazo non superior a tres meses desde o inicio da actividade, o Instituto Tecnolóxico para o Control do Medio Mariño de Galicia realizará unha primeira convocatoria das probas necesarias para a selección do persoal laboral fixo, que se realizarán de acordo cos principios e coas previsións establecidos no artigo 13.2 desta lei.

O número de prazas para ofertar nesta primeira convocatoria será, como mínimo, igual ás prazas ocupadas polo persoal laboral temporal e persoal interino existentes no Centro de Control do Medio Mariño no momento da súa extinción.

Disposición derogatoria. Derrogación xenérica

Quedan derogadas cantas disposicións de igual ou inferior rango se opoñan ao establecido nesta lei.

Disposición derradeira primeira. Desenvolvemento regulamentario

Autorízase o Consello da Xunta a ditar cantas normas sexan precisas para efectuar o desenvolvemento e a correcta aplicación desta lei. No prazo de tres meses desde a entrada en vigor desta lei, o Consello da Xunta deberá aprobar o decreto de desenvolvemento da lei, e esta aprobación é requisito necesario para o inicio das actividades.

Disposición derradeira segunda. Entrada en vigor

Esta lei entrará en vigor aos vinte días da súa publicación no *Diario Oficial de Galicia*.

Santiago de Compostela, 13 de maio de 2004

Ramón Carballo Páez
Presidente da Comisión
Ismael Rego González
Secretario da Comisión

Emendas e votos particulares formulados ao Ditame sobre o Proxecto de lei de creación do Instituto Tecnolóxico para o Control do Medio Mariño de Galicia

Presidencia

De conformidade co disposto nos artigos 65 e concordantes do Regulamento da Cámara, ordénase a publicación no *Boletín Oficial do Parlamento de Galicia* das emendas e dos votos particulares formulados ao Ditame emitido pola Comisión 8.^a, Pesca e Marisqueo sobre o Proxecto de lei de creación do Instituto Tecnolóxico para o Control do Medio Mariño de Galicia

Santiago de Compostela, 21 de maio de 2004

José María García Leira
Presidente

Emendas mantidas polo G.P. dos Socialistas de Galicia

Doc. núm. 15692

«Á Mesa do Parlamento

O Grupo Parlamentario dos Socialistas de Galicia, a través do seu portavoz e ao abeiro do disposto no artigo 119 do Regulamento da Cámara, comunícalle a esa Presidencia que mantén para a súa defensa en Pleno todas as emendas presentadas ao Proxecto de lei de creación do Instituto Tecnolóxico para o Control do Medio Mariño de Galicia, que non foron incorporadas ao dictame da Comisión, agás as aceptadas, as transacionadas e as retiradas.

Pazo do Parlamento, 18 de maio de 2004

Asdo.: Emilio Pérez Touriño
Portavoz do G.P. dos Socialistas de Galicia»

Emendas mantidas polo G.P. do Bloque Nacionalista Galego

Doc. núm. 15698

«Á Mesa do Parlamento

O Grupo Parlamentar do Bloque Nacionalista Galego (BNG), ao abeiro do disposto no Regulamento da Cámara, mantén, para a súa defensa en Pleno, todas as emendas apre-

sentadas ao Proxecto de lei de creación do Instituto Tecnolóxico para o Control do Medio Mariño de Galiza, que non foron incorporadas ao Dictame da Comisión.

Santiago de Compostela, 18 de Maio de 2004

Asdo.: Alfredo Suárez Canal

Portavoz S. do G.P. do BNG.»

BOLETÍN OFICIAL DO PARLAMENTO DE GALICIA
ESTRUCTURA

1. PROCEDEMENTOS DE NATUREZA NORMATIVA

1.1 LEIS E OUTRAS NORMAS

1.1.1 LEIS

1.1.2 REGULAMENTO DO PARLAMENTO

1.1.3 NORMAS COMPLEMENTARIAS E RESOLUCIÓNS INTERPRETATIVAS DO REGULAMENTO

1.1.4 CONVENIOS E ACORDOS DE COOPERACIÓN CON COMUNIDADES AUTÓNOMAS

1.2 PROXECTOS E PROPOSICIÓNS DE LEI

1.2.1 PROXECTOS DE LEI

1.2.2 PROPOSICIÓNS DE LEI

1.2.3 PROPOSICIÓNS DE LEI DE INICIATIVA POPULAR

1.3 OUTRAS PROPOSTAS DE NORMAS

1.3.1 PROPOSICIÓNS DE REFORMA DO REGULAMENTO DO PARLAMENTO

1.3.2 PROPOSICIÓNS DE LEI PARA PRESENTAR PERANTE O CONGRESO DOS DEPUTADOS

1.3.3 PROPOSTAS DE CONVENIOS E ACORDOS DE COOPERACIÓN CON COMUNIDADES AUTÓNOMAS

2. PROCEDEMENTOS ESPECIAIS DE CARÁCTER INSTITUCIONAL

2.1 INVESTIDURA

2.2 MOCIÓN DE CENSURA

2.3 CUESTIÓN DE CONFIANZA

3. PROCEDEMENTOS DE CONTROL E IMPULSO

3.1 CONTROL SOBRE AS DISPOSICIÓNS DA XUNTA CON FORZA DE LEI

3.1.1 DECRETOS LEXISLATIVOS

3.1.2 OBXECCIÓNS

3.1.3 DITAME DA COMISIÓN

3.1.4 RESOLUCIÓN DO PLENO

3.2 COMUNICACIÓNS DA XUNTA DE GALICIA

3.2.1 COMUNICACIÓN DA XUNTA DE GALICIA

3.2.2 PROPOSTAS DE RESOLUCIÓN

3.2.3 RESOLUCIÓNS APROBADAS

3.3 EXAME DE PROGRAMAS E PLANS

3.3.1 PROGRAMAS E PLANS

3.3.2 INFORME DA PONENCIA

3.3.3 PROPOSTAS DE RESOLUCIÓN

3.3.4 RESOLUCIÓNS APROBADAS

3.4 ACORDOS, RESOLUCIÓNS OU PROPOSTAS DE COMISIÓNS ESPECIAIS OU DE INVESTIGACIÓN

3.5 MOCIÓNS

3.5.1 MOCIÓNS

3.5.2 EMENDAS ÁS MOCIÓNS

3.5.3 MOCIÓNS APROBADAS

3.6 PROPOSICIÓNS NON DE LEI

3.6.1 PROPOSICIÓNS NON DE LEI EN PLENO

3.6.1.1 PROPOSICIÓNS

3.6.1.2 EMENDAS ÁS PROPOSICIÓNS

3.6.1.3 PROPOSICIÓNS APROBADAS

3.6.2 PROPOSICIÓNS NON DE LEI EN COMISIÓN

3.6.2.1 PROPOSICIÓNS

3.6.2.2 EMENDAS ÁS PROPOSICIÓNS

3.6.2.3 PROPOSICIÓNS APROBADAS

3.7 OUTRAS PROPOSTAS DE RESOLUCIÓN

3.7.1 PROPOSTAS DE RESOLUCIÓN DA PRESIDENCIA E A MESA

3.7.2 DECLARACIÓNS INSTITUCIONAIS

3.7.3 OUTRAS RESOLUCIÓNS

3.8 PROCEDEMENTOS DE CONTROL ECONÓMICO E ORZAMENTARIO

3.8.1 MEMORIA ANUAL DO CONSELLO DE CONTAS E INFORME DE FISCALIZACIÓN DAS CONTAS DO SECTOR PÚBLICO DA COMUNIDADE AUTÓNOMA

3.8.2 INFORMES SOBRE O ESTADO DE EXECUCIÓN DO ORZAMENTO

4. PROCEDEMENTOS DE INFORMACIÓN

4.1 SOLICITUDES DE COMPARECENCIA

4.1.1 SOLICITUDES DE COMPARECENCIA EN PLENO

4.1.2 SOLICITUDES DE COMPARECENCIA EN COMISIÓN

4.2 INTERPELACIÓNS

4.3 PREGUNTAS

4.3.1 PREGUNTAS ORAIS EN PLENO

4.3.1.1 PREGUNTAS URGENTES

4.3.1.2 PREGUNTAS AO PRESIDENTE DA XUNTA DE GALICIA

(Continúa)

- 4.3.2 PREGUNTAS ORAIS EN COMISIÓN
- 4.3.3 PREGUNTAS POR ESCRITO
- 4.4 RESPÓSTAS A PREGUNTAS
- 4.5 SOLICITUDES DE DATOS, INFORMES E DOCUMENTOS
- 5. PROCEDEMENTOS RELATIVOS A OUTRAS INSTITUCIÓNS E ÓRGANOS
 - 5.1 SOLICITUDE AO GOBERNO DO ESTADO DA ADOPCIÓN DE PROXECTOS DE LEI
 - 5.2 PROCEDEMENTOS RELACIONADOS CO TRIBUNAL CONSTITUCIONAL
 - 5.3 VALEDOR DO POBO
 - 5.3.1 NORMAS RELATIVAS AO VALEDOR DO POBO
 - 5.3.2 INFORMES DO VALEDOR DO POBO
 - 5.3.3 RESOLUCIÓNS DO VALEDOR DO POBO
 - 5.4 CONSELLO DE CONTAS
 - 5.4.1 NORMAS RELATIVAS AO CONSELLO DE CONTAS
 - 5.4.2 INFORMES DO CONSELLO DE CONTAS
 - 5.5 OUTRAS INSTITUCIÓNS E ÓRGANOS
- 6. ELECCIÓN, DESIGNACIÓN E PROPOSTAS DE NOMEAMENTO
 - 6.1 SENADORES EN REPRESENTACIÓN DA COMUNIDADE AUTÓNOMA
 - 6.2 VALEDOR DO POBO E VICEVALEDORES
 - 6.3 CONSELLEIROS DE CONTAS
 - 6.4 TERNA PARA A PROVISIÓN DE VACANTES DO TRIBUNAL SUPERIOR DE XUSTIZA DE GALICIA
 - 6.5 VOCAIS DA XUNTA ELECTORAL DE GALICIA
 - 6.6 MEMBROS DO CONSELLO DE ADMINISTRACIÓN DA COMPAÑÍA DE RADIO-TELEVISIÓN DE GALICIA
 - 6.7 MEMBROS DO CONSELLO ASESOR DE RADIO-TELEVISIÓN ESPAÑOLA EN GALICIA
 - 6.8 VOCAIS DOS CONSELLOS SOCIAIS DAS UNIVERSIDADES DE GALICIA
 - 6.9 VOCAIS DO CONSELLO DE BIBLIOTECAS
 - 6.10 DELEGACIÓN PARA A DEFENSA DE PROPOSICIÓNS DE LEI DO PARLAMENTO DE GALICIA NO CONGRESO
 - 6.11 OUTRAS ELECCIÓN, DESIGNACIÓN OU PROPOSTAS DE NOMEAMENTO
- 7. COMPOSICIÓN DO PARLAMENTO, RÉXIME E GOBERNO INTERIOR, ORGANIZACIÓN E FUNCIONAMENTO
 - 7.1 COMPOSICIÓN DO PARLAMENTO E OS SEUS ÓRGANOS
 - 7.1.1 COMPOSICIÓN DO PLENO
 - 7.1.2 COMPOSICIÓN DA DEPUTACIÓN PERMANENTE
 - 7.1.3 COMPOSICIÓN DA MESA DO PARLAMENTO
 - 7.1.4 COMPOSICIÓN DA MESA-XUNTA DE PORTAVOCES
 - 7.1.5 COMPOSICIÓN DAS COMISIÓNS
 - 7.1.6 COMPOSICIÓN DA MESA DAS COMISIÓNS
 - 7.1.7 COMPOSICIÓN DOS GRUPOS PARLAMENTARIOS
 - 7.2 RÉXIME E GOBERNO INTERIOR
 - 7.2.1 NORMAS DE RÉXIME E GOBERNO INTERIOR
 - 7.2.2 ESTATUTO DOS DEPUTADOS E GRUPOS PARLAMENTARIOS
 - 7.2.3 ORZAMENTO DO PARLAMENTO
 - 7.2.4 CONTA XERAL DO PARLAMENTO
 - 7.3 ORGANIZACIÓN E FUNCIONAMENTO DO PARLAMENTO
 - 7.3.1 CONSTITUCIÓN DO PARLAMENTO
 - 7.3.2 PROPOSTAS DE RESOLUCIÓN POLAS QUE SE CREAN COMISIÓNS
 - 7.3.3 CONVOCATORIAS
 - 7.3.4 ACORDOS, RESOLUCIÓNS E COMUNICACIÓNS DOS ÓRGANOS DA CÁMARA
 - 7.3.4.1 CONVALIDACIÓN DOS ACORDOS DA DEPUTACIÓN PERMANENTE
 - 7.3.4.2 NORMAS DE FUNCIONAMENTO DE COMISIÓNS NON PERMANENTES
 - 7.3.4.3 PRÓRROGAS DOS PERÍODOS DE SESIÓNS
 - 7.3.4.4 HABILITACIÓN DE DÍAS HÁBILES
 - 7.3.4.5 DÍAS E HORAS DE REXISTRO DE DOCUMENTOS
 - 7.3.4.6 OUTRAS RESOLUCIÓNS E ACORDOS
 - 7.3.5 DISOLUCIÓN DO PARLAMENTO
- 8. ADMINISTRACIÓN PARLAMENTARIA
 - 8.1 ORGANIZACIÓN E NORMAS DE FUNCIONAMENTO DOS SERVIZOS DA ADMINISTRACIÓN PARLAMENTARIA
 - 8.2 PERSOAL
 - 8.3 ACTIVIDADES DA ADMINISTRACIÓN PARLAMENTARIA
 - 8.3.1 CONTRATACIÓN ADMINISTRATIVA
 - 8.3.2 XESTIÓN ECONÓMICA
 - 8.3.3 CONVENIOS E ACORDOS
 - 8.3.4 AXUDAS E BOLSAS
 - 8.3.5 PUBLICACIÓNS
- 9. INFORMACIÓNS E CORRECCIÓNS DE ERROS
 - 9.1 INFORMACIÓNS
 - 9.2 CORRECCIÓNS DE ERROS



Edición e subscricións: Servicio de Publicacións do Parlamento de Galicia.
Hórreo, 63. 15702. Santiago de Compostela. Telf. 981 55 13 00. Fax. 981 55 14 25

Impresión e distribución: La Voz de Galicia, S.A.
Ronda de Outeiro, 1-3. 15006. A Coruña.

Dep. Leg. C-155-1982. ISSN 1133-2727